

Rentak Kampus

Oleh SAIRUL ZAMRI MISRANI

SERAMAI 18 pelajar Tokyo NODAI 'terbang' ke Malaysia bagi mengikuti Program Mobiliti Pelajar bersama Universiti Putra Malaysia Sarawak (UPMS) baru-baru ini.

Program tersebut memberi fokus kepada komuniti luar bandar di Rumah Panjang Uta Anak Garai, Sungai Sepi, Sibul, Sarawak. Sepanjang program tiga hari itu berlangsung, para pelajar berpeluang merasai kehidupan masyarakat di Rumah Panjang Uta Anak Garai, sekali gus menyelami keunikan budaya tempatan.

Delegasi dari negara Matahari Terbit itu juga dapat menghayati sendiri gaya dan cara hidup masyarakat di rumah panjang.

Pengarah program, Dr. Keeren Sundara Rajoo berkata, kejayaan program mobiliti itu bukan semata-mata diukur melalui kuliah atau penyelidikan, sebaliknya menerusi persahabatan dan penghormatan rentas budaya yang terjalin.

"Pengalaman yang diperoleh daripada program ini bukan sekadar aktiviti sosial. Sebaliknya, mencerminkan bagaimana ilmu dan budaya mampu menjalin hubungan yang memperkukuh daya tahan komuniti."

"Bagi penduduk rumah panjang, peluang ini merupakan platform untuk mereka mempersembahkan warisan budaya kepada pelajar antarabangsa dan mengukuhkan semangat komuniti."

"Gabungan akademik, warisan budaya dan penglibatan komuniti adalah asas memperkukuh kerjasama antarabangsa serta daya tahan masyarakat tempatan," katanya kepada K-Kompas.

Keeran menambah, program tersebut membuktikan bahawa universiti bukan hanya berfungsi sebagai tempat menuntut ilmu.

Bahkan, universiti berfungsi sebagai jambatan yang menghubungkan masyarakat



SEBAHAGIAN pelajar Tokyo NODAI yang menyertai program mobiliti pelajar bersama UPMS.

PARA pelajar Tokyo NODAI bergambar kenangan bersama penduduk Rumah Panjang Uta Anak Garai, Sibul, Sarawak.



UPMS angkat budaya Sarawak ke pentas global

Pengalaman yang diperoleh daripada program ini bukan sekadar aktiviti sosial. Sebaliknya, mencerminkan bagaimana ilmu dan budaya mampu menjalin hubungan yang memperkukuh daya tahan komuniti."

luar dengan komuniti setempat. Sementara itu, salah seorang pelajar Tokyo NODAI, Haruka Tsubota berkata, program tersebut memberi pendedahan berharga tentang kehidupan masyarakat luar bandar di Sarawak serta nilai kelestarian yang diamalkan mereka.

"Saya memperoleh pengalaman unik yang tidak mungkin didapati di tempat lain. Ia merupakan peluang sekali seumur hidup yang dapat saya rasai."

"Saya dan rakan-rakan dapat belajar memasak ayam pansuh di dalam buluh, menganyam bakul dan berkongsi budaya kami bersama masyarakat rumah panjang," katanya.

Bagi seorang lagi pelajar Tokyo NODAI, Tomoka Kamata berkata, dia teruja apabila dapat melihat sendiri alat muzik dan pakaian tradisional masyarakat Iban ketika



PARA pelajar belajar memasak ayam pansuh yang merupakan makanan autentik masyarakat rumah panjang di Sarawak.



WAKIL delegasi Tokyo NODAI memberikan ucapan penghargaan kepada penduduk rumah panjang.

mengunjungi pasar pagi bersama pelajar UPMS.

"Ia satu pengalaman manis, dan saya turut merasai makanan tempatan di sini."

"Saya dapati nasi yang dibungkus dengan daun pisang di sini rasanya hampir sama dengan nasi 'mochigome' yang ada di Jepun," katanya.

Dalam pada itu, pelajar jurusan International Agricultural Development,

Tokyo NODAI, Natsuni Konno pula menyifatkan penyertaan dalam program itu telah membuka peluang kepadanya untuk mengenali Malaysia dengan lebih dekat.

"Saya tidak akan mengenali Malaysia lebih dekat jika tidak menyertai program ini."

"Pada mulanya, saya sangat gementar, namun pelajar serta pensyarah UPMS sangat menyokong dan baik hati. Jadi, saya berasa lega dan seronok," katanya.



PARA pelajar diajar mengenai cara menghasilkan salah satu kraf tangan masyarakat rumah panjang.



PROSES menganyam tikar turut didedahkan kepada para pelajar sepanjang lawatan tiga hari itu.